



PORTA-VOZ V GOVERN U KONSTITUSIONÁL



KOMUNIKADU
BA MEDIA

Loron 2 Fulan Maiu Tinan 2013
Díli, Timor-Leste

Vizita ofisiál ba Tailândia sai hanesan susesu ida iha fortalesimentu lasu globál sira

Primeiru-Ministru Timor-Leste nian, Kay Rala Xanana Gusmão, hakotu Vizita Ofisiál ba Reiu Tailândia nian. Delegasaun Timor nian, ne'ebé halo vizita ba NASAUN ne'e tuir konvite husi Governu Reál Tailândia nian, inklui Ministra-Finansa, Emília Pires, Ministru Edukasaun, Bendito Freitas, Ministru Turizmu, Francsico Kalbuadi Lay, Sekretáriu Estadu ba Asuntu ASEAN nian, Roberto Soares.

Primeira-Ministra Tailândia nian, Yingluck Shinawatra, felisita Primeiru-Ministru Xanana Gusmão ba ninia reeleisaun no espresa ninia fiar iha ninia esperiénsia no lideransa nu'udar Xefe Governu Timor-Leste nian atu lori dame no moris d'iak ba NASAUN no povu Timor. Iha han-kalan hamutuk ida, ne'ebé Primeira-Ministra ne'e oferese, Yingluck Shinawatra hateten: "Ohin Ioron Timor-Leste hatudu ba mundu katak nia iha kontrolu totál kona-ba ninia destinu rasik hafoin Nasoins Unidas hakotu nia misaun. Iha potensiál boot ida iha ninia ekonomia no turizmu ne'ebé, tuir realidade, sei dezenvolvidu liután liuhusi ninia Planu Estratégiku Dezenvolvimentu ba tinan 20. Tailândia sei kontinua hanesan apoiante no belun Timor-Leste nian iha ninia prosesu kreximentu no dezenvolvimentu nian."

Iha sorumutu bilaterál sira, ne'ebé hala'o durante vizita ne'e, ne'ebé foka liu kona-ba fortalesimentu parseria nian iha área hirak ne'ebé inklui kooperasaun téknika, komérsiu no investimentu, kooperasaun iha nível enerjia, edukasaun no kooperasaun rejionál, sai hanesan susesu ida no Primeira-Ministra Tailândia nian reafirma kompromisu ninia NASAUN atu apoia Timor-Leste tama ba ASEAN.

Primeiru-Ministru Xanana Gusmão vizita Palásiu Dusit no Projetu Agrícola *Royal Chitralada*, ne'ebé ko'alía liu kona-ba implementasaun husi inisiativa Sua Majestade Liurai Bhuimbol Adulyadej ne'ebé hanaran "Ekonomia Sufisiénsia nian", filozofia koñesida Tailândia nian kona-ba dezenvolvimentu ekonómiku. Tailândia valoriza filozofia ekonómika foun ida ne'e nu'udar ferramenta práтика ida atu jere, ho forma efikáz, kapitalizmu atu ida ne'e bele aliña-an no envolve-an ho práтика hirak ne'ebé sustentável husi pontudevista sosiál nian.

Aleinde ne'e, Primeiru-Ministru Xanana Gusmão partisipa mós iha almosu ida ne'ebé organiza husi *Zero Hunger Challenge in Asia and the Pacific* husi Nasoins Unidas, eventu ne'ebé halibur líder nasional no internasional sira iha apelu ida ba Governu, agrikultór sira, cientista sira, negósiu na'in sira, sosiedade sivil



Ágio Pereira
+670 77045002
agio.pereira@cdm.gov.tl
govtimedia@gmail.com
www.timor-leste.gov.tl

no konsumidór sira, ho hanoin atu servisu hamutuk hodi halakon hamlaha iha rejiaun ida ne'ebé maiorparte ema falta aihán sira iha mundu moris ba.

Primeiru-Ministru Timor nian hatudu ninia agradesimentu, hodi Governu no povu Timor-Leste nian naran, ba apoiu kontínuu husi Governu no Povu Tailândia nian. Oras ne'e daudaun, timoroan hamutuk 100 mak estuda hela iha Universidade sira iha Tailândia, no iha mós diálogu kontínuu ida ho ofisiál Tailândia nian sira kona-ba oinsá haka'as an hamutuk liután iha kapasitasaun. Ministru Edukasaun, Bendito Freitas, halibur malu ho grupu estudante timoroan lubun ida atu fó aten barani ba sira iha sira nia esforsu sira no deskute kona-ba ninia progresu.

Primeiru-Ministru hala'o mós sorumutu bilaterál sira ho Sekretáriu-Jeral Adjuntu Nasoins Unidas nian, Jan Eliasson, no ho Prezidente Birmânia nian. Birmânia sei kaer knaar prezidénsia rotativa ASEAN nian iha tinan 2014. Iha sorumutu ida ne'e, Primeiru-Ministru Xanana Gusmão fó hatene ba Prezidente Thein Sein ninia apoiu ba dezenvolvimentu, no promete sei halo vizita ba nasaun ne'e iha tempu besik.

Vizita ba Tailândia termina ho omenajen ida ne'ebé la espera, bainhira Timor-Leste hetan nomeasaun, husi grupu ida ho membru nasaun hamutuk 62, atu kaer knaar Prezidénsia UNESCAP, Komisaun Ekonómika no Sosiál Nasoins Unidas nian ba Ázia-Pasífiku. Primeiru-Ministru Xanana Gusmão simu nomeasun ne'e no prezide ona sorumutu dahuluk husi mandatu tinan ida ne'ebé fó ba Timor-Leste. **FIN**



Ágio Pereira

+670 77045002

agio.pereira@cdm.gov.tl

govtlmedia@gmail.com

www.timor-leste.gov.tl